



KEMENTERIAN PENGANGKUTAN
MALAYSIA

SIARAN MEDIA MENTERI PENGANGKUTAN MALAYSIA

LAPANGAN TERBANG BAHARU MUKAH, SARAWAK MULA BEROPERASI 17 JUN 2021

Kementerian Pengangkutan Malaysia (MOT) dengan kerjasama Kerajaan Negeri Sarawak serta Malaysia Airports Holdings Berhad (MAHB) memaklumkan bahawa Lapangan Terbang Baharu Mukah, Sarawak telah siap sepenuhnya untuk beroperasi mulai 17 Jun 2021 dengan pendaratan pertama pesawat MASwings MH3553 DHC6 Vikings dari Miri pada 9.10 pagi dan penerbangan pertama MH3412 ke Kuching pada jam 9.30 pagi.

Projek Pembinaan Lapangan Terbang Baharu Mukah di lokasi baharu iaitu 7 kilometer dari pusat bandar Mukah, dimulakan sejak 11 Ogos 2017 menggantikan STOLport Mukah dengan kapasiti baharu iaitu 265 ribu penumpang setahun. Lapangan Terbang Baharu Mukah direka bentuk untuk memberikan keselesaan dan menepati kehendak rakyat Mukah yang menggunakan perkhidmatan udara luar bandar yang menjadi nadi kepada pergerakan penumpang dan barangan di kawasan terbabit.

Reka bentuk Lapangan Terbang Baharu Mukah dilengkapi dengan bangunan terminal baharu seluas 3,125 meter persegi, landasan sepanjang 1,500 meter dan lebar 30 meter, apron, taxiway selebar 15 meter dan tempat letak kenderaan awam dengan kapasiti 100 buah kereta dan 20 buah motosikal termasuk 20 teksi dan 2 bas. Lapangan Terbang Baharu Mukah juga menempatkan Menara Kawalan Trafik Udara, Pejabat Pihak Berkuasa Penerbangan Awam Malaysia (CAAM), Jabatan Metrologi (MET) dan Bangunan Jabatan BOMBA. Selain itu, Lapangan Terbang Baharu Mukah juga dilengkapi dengan sistem Wind & Runway Visual Range (WRVR) dan sistem navigasi radio Doppler VHF Omnidirectional Range (DVOR) serta sistem pencahayaan pendekatan sederhana.

Kementerian Pengangkutan dan Kerajaan Negeri Sarawak yakin dan percaya bahawa dengan beroperasinya Lapangan Terbang Baharu Mukah ini, ia akan menyokong pembangunan Sarawak Government's Economic Plan for SCORE (Sarawak Corridor of Renewable Energy) di samping menggalakkan pertumbuhan ekonomi daerah Mukah dengan memudahkan pergerakan sektor perdagangan dan eksport pertanian, perikanan, makanan dan produk tempatan iaitu sago, nanas tempatan (sawit) dan umai (makanan istimewa Melanau).





KEMENTERIAN PENGANGKUTAN
MALAYSIA

Pembangunan Lapangan Terbang Baharu Mukah juga akan menyokong pembangunan daerah Mukah sebagai Hab Pendidikan, Pusat Penyelidikan, Pembangunan serta Taman Perindustrian Matadeng.

Selain itu, diharapkan dengan pengoperasian Lapangan Terbang Baharu Mukah ini juga dapat mempercepat dan memudahkan akses pembekalan vaksin COVID-19 ke kawasan-kawasan pedalaman seterusnya merealisasikan hasrat Kerajaan dalam membina imuniti kelompok menerusi Program Imunisasi COVID-19 Kebangsaan (PICK).

DATUK SERI IR. DR. WEE KA SIONG
MENTERI PENGANGKUTAN MALAYSIA
16 JUN 2021

-TAMAT-

Tentang MOT:

Kementerian Pengangkutan Malaysia bertekad untuk menjadi peneraju transformasi sistem pengangkutan yang bersepadu, efisien dan selamat dengan memperkasakan sistem pengangkutan berteraskan teknologi sebagai pemangkin pembangunan negara.

Pertanyaan Media
Kementerian Pengangkutan Malaysia

Hotline 1-800-88-7723
Faks +603 8892 0208
E-mel aduan@mof.gov.my

